

KGOELETŠO**ka****Mopresidente wa Rephabliki ya Afrika Borwa****PHETOŠO YA DIPEELANO TŠA TŠHUPETŠO TŠA KHOMIŠENE YA
DINYAKIŠIŠO GO THUTO YA GODIMO LE TLHAHLO**

Go ya ka maatla ao ke a neilwego ka karolo 1 ya *Commissions Act*. 1947 (Molao 8 wa 1947) ke fetoša Dipeelano tša Tšhupetšo tša Khomišene ya Dinyakišišo go Thuto ya Godimo le Tlhahlo bjalo ka ge go gatišitšwe ka tlase ga Kgoeletšo 1 ka gare ga *Kuranta ya Mmušo* ya nomoro 39608 ya 22 Pherekong 2016 bjalo ka ge go laeditšwe Šetuleng.

E newa ka tlase ga taolo ya ka le Leswao la Rephabliki ya Afrika Borwa go la
..... ka la letšatšikgwedi la
..... Dikete tše Pedi le lesometshela.

Mopresidente

Ka taelo ya Mopresidente Kabineteng:

Tona ya Kabinete

ŠETULE**DIPEELANO TŠA TŠHUPETŠO TŠA KHOMIŠENE YA DINYAKIŠIŠO GO THUTO YA GODIMO LE TLHAHLO**

LE GE Mopresidente wa Rephabliki ya Afrika Borwa, Mrn JG Zuma ka la 23 Diphallane 2015, a swere kopano le Batlatša batšhanselara, Badulasetulo ba dikhansela tša Diyuniibesithi, Bapresidente ba Khansela ya Kemedi ya Baithuti le kemedi ya Mekgatlo ya Baithuti ya setšhaba ka bophara bakeng sa go rerišana ka dingongoregokgolo mabapi le hlatlošo ya ditefišo le thušo ya tšhelete ya thuto ya godimo;

MME LE GE Mopresidente a dumetše gore mmušo o tla etapele tshepetšo yeo e tla lebelelago merero ka bophara yeo e amago thušo ya tšhelete ya thuto ya godimo, go eleletša matsapa a mangwe ka tsela yeo;

KA FAO Khomišene ya Dinyakišišo (“Khomišene”) e a thwalwa go ya ka Karolo 84(2)(f) ya Molaotheo wa Rephabliki ya Afrika Borwa wa 1996.

Khomišene e tla nyakišiša, ya dira dikhwetšo, ya bega ka ga mme le go dira diswayaswayo ka tše dilatelago:

1. Kgonagalo ya go phethagaletša thuto ya godimo le tlhahlo (thuto ya godimo) ya ntle le tefelo mo Afrika Borwa, go eleletšwa-
 - 1.1 Molaotheo wa Rephabliki ya Afrika Borwa, melao ka moka ye malebana ya thuto ya godimo le ya motheo, dikhwetšo ka moka le diswayaswayo tša Dihlopha tša Tiro tše farologanego tša Mopresidente le Ditona, gammogo le dipholisi ka moka tše malebana tša thuto, dipego le methalohlahli;
 - 1.2 Dintlha tše farologanego tša go ya go ile thušong ya tša ditšhelete, phetleko le tekolo ya tema ya mmušo gammogo le diagente, baithuti, dihlongwa, lekala la dikgwebo le bathwadi thušong ya ditšhelete ya thuto ya godimo le tlhahlo;

- 1.3 Boikemelo bja dihlongwa le boitaolo bjo swanetšego go diragala malebana le mokgwa wa go thuša ka ditšhelete.
2. *Commissions Act*, 1947 (Molao 8 wa 1947), e tla šoma go Khomišene, go ya ka diphetolo le dikgethollo ka moo go ka laetšwago ka kgoeletšo ya nako le nako.
3. Khomišene e tla romela dipego tša nakwana le diswayaswayo go Mopresidente ge go na le hlokego gape le Pego ya Mathomo ka la 15 Dibatsela 2016.
4. Khomišene e swanetše go phethagatša mošomo wa yona [**mo nakong ya dikgwedi tše 8(seswai) go tloga ka letšatšikgwedi leo**] pele ga letšatšikgwedi la 30 Phupu 2017 mme e swanetše go romela pego ya yona ya mafelelo go Mopresidente mo nakong ya dikgwedi tše 2(pedi) morago ga letšatšikgwedi leo Khomišene e phethagatšago mošomo wa yona.
5. Melawana e tla dirwa go ya ka *Commissions Act*, 1947 mme e tla šoma go Khomišene go kgontšha Khomišene go diragatša dinyakišišo tša yona ka swanelo mme le go nolofatša kgoboketšo ya tshedimošo ka go nea Khomišene maatla ao a hlokegago, go akaretšwa maatla a go tsena lefelong, go netefatša go ba gona ga dihlatse le go gapeletša tšweletšo ya ditokomane.
6. Dipeelano tša tšhupetšo di ka fetošwa ka nako efe goba efe ka therišano le Bakomešenara.
7. Makala a mmušo ka moka, dihlongwa le bakgathatema ba swanetše go šomišana le Khomišene ka phethagalo.